人之初, 性本善。性相近, 习相远。

苟不教, 性乃迁。教之道, 贵以专。

昔孟母, 择邻处。子不学, 断机杼。

窦燕山,有义方。教五子,名俱扬。

养不教,父之过。教不严,师之惰。

子不学, 非所宜。幼不学, 老何为。

玉不琢,不成器。人不学,不知义。

为人子, 方少时。亲师友, 习礼仪。

香九龄,能温席。孝于亲,所当执。

融四岁,能让梨。弟于长,宜先知。

首孝悌, 次见闻。知某数, 识某文。

一而十,十而百。百而千,千而万。

三才者, 天地人。三光者, 日月星。

三纲者, 君臣义。父子亲, 夫妇顺。

曰春夏, 曰秋冬。此四时, 运不穷。

曰南北, 曰西东。此四方, 应乎中。

曰水火,木金土。此五行,本乎数。

十干者, 甲至癸。十二支, 子至亥。

曰黄道, 日所躔。曰赤道, 当中权。

赤道下,温暖极。我中华,在东北。

曰江河, 曰淮济。此四渎, 水之纪。

曰岱华, 嵩恒衡。此五岳, 山之名。

曰士农, 曰工商。此四民, 国之良。

曰仁义,礼智信。此五常,不容紊。

地所生,有草木。此植物,遍水陆。

有虫鱼,有鸟兽。此动物,能飞走。

稻粱菽,麦黍稷。此六谷,人所食。

马牛羊,鸡犬豕。此六畜,人所饲。

曰喜怒,曰哀惧。爱恶欲,七情具。

青赤黄,及黑白。此五色,目所识。

酸苦甘,及辛咸。此五味,口所含。

膻焦香,及腥朽。此五臭,鼻所嗅。

匏土革,木石金。丝与竹,乃八音。

曰平上, 曰去入。此四声, 宜调协。

高曾祖,父而身。身而子,子而孙。

自子孙,至玄曾。乃九族,人之伦。

父子恩, 夫妇从。兄则友, 弟则恭。

长幼序, 友与朋。君则敬, 臣则忠。

此十义,人所同。当师叙,勿违背。

斩齐衰,大小功。至缌麻,五服终。

礼乐射,御书数。古六艺,今不具。

惟书学,人共遵。既识字,讲说文。

有古文, 大小篆。隶草继, 不可乱。

若广学, 惧其繁。但略说, 能知原。

凡训蒙,须讲究。详训诂,明句读。

为学者,必有初。小学终,至四书。

论语者,二十篇。群弟子,记善言。

孟子者, 七篇止。讲道德, 说仁义。

作中庸, 子思笔。中不偏, 庸不易。

作大学, 乃曾子。自修齐, 至平治。

孝经通, 四书熟。如六经, 始可读。

诗书易,礼春秋。号六经,当讲求。

有连山,有归藏。有周易,三易详。

有典谟,有训诰。有誓命,书之奥。

我周公,作周礼。著六官,存治体。

大小戴, 注礼记。述圣言, 礼乐备。

曰国风, 曰雅颂。号四诗, 当讽咏。

诗既亡,春秋作。寓褒贬,别善恶。

三传者,有公羊。有左氏,有谷梁。

经既明, 方读子。撮其要, 记其事。

五子者,有荀扬。文中子,及老庄。

经子通,读诸史。考世系,知终始。

自羲农,至黄帝。号三皇,居上世。

唐有虞,号二帝。相揖逊,称盛世。

夏有禹,商有汤。周武王,称三王。

夏传子,家天下。四百载,迁夏社。

汤伐夏, 国号商。六百载, 至纣亡。

周武王,始诛纣。八百载,最长久。

周辙东,王纲坠。逞干戈,尚游说。

始春秋,终战国。五霸强,七雄出。

嬴秦氏,始兼并。传二世,楚汉争。

高祖兴,汉业建。至孝平,王莽篡。

光武兴, 为东汉。四百年, 终于献。

魏蜀吴,争汉鼎。号三国,迄两晋。

宋齐继,梁陈承。为南朝,都金陵。

北元魏, 分东西。宇文周, 与高齐。

迨至隋,一土宇。不再传,失统绪。

唐高祖,起义师。除隋乱,创国基。

二十传, 三百载。梁灭之, 国乃改。

梁唐晋, 及汉周。称五代, 皆有由。

炎宋兴, 受周禅。十八传, 南北混。

辽与金,皆称帝。元灭金,绝宋世。

舆图广, 超前代。九十年, 国祚废。

太祖兴,国大明。号洪武,都金陵。

迨成祖, 迁燕京。十六世, 至崇祯。

权阉肆, 寇如林。李闯出, 神器焚。

清世祖, 膺景命。靖四方, 克大定。

由康雍, 历乾嘉。民安富, 治绩夸。

道咸间,变乱起。始英法,扰都鄙。

同光后,宣统弱。传九帝,满清殁。

革命兴,废帝制。立宪法,建民国。

古今史,全在兹。载治乱,知兴衰。

史虽繁,读有次。史记一,汉书二。

后汉三, 国志四。兼证经, 参通鉴。

读史者,考实录。通古今,若亲目。

口而诵,心而惟。朝于斯,夕于斯。

昔仲尼,师项橐。古圣贤,尚勤学。

赵中令,读鲁论。彼既仕,学且勤。

披蒲编,削竹简。彼无书,且知勉。

头悬梁, 锥刺股。彼不教, 自勤苦。

如囊萤,如映雪。家虽贫,学不辍。

如负薪,如挂角。身虽劳,犹苦卓。

苏老泉,二十七。始发愤,读书籍。

彼既老, 犹悔迟。尔小生, 宜早思。

若梁灏,八十二。对大廷,魁多士。

彼既成, 众称异。尔小生, 宜立志。

莹八岁,能咏诗。泌七岁,能赋棋。

彼颖悟,人称奇。尔幼学,当效之。

蔡文姬,能辨琴。谢道韫,能咏吟。

彼女子,且聪敏。尔男子,当自警。

唐刘晏, 方七岁。举神童, 作正字。

晏虽幼,身已仕。有为者,亦若是。

犬守夜,鸡司晨。苟不学,曷为人。

蚕吐丝,蜂酿蜜。人不学,不如物。

幼而学, 壮而行。上致君, 下泽民。

扬名声,显父母。光于前,裕于后。

人遗子,金满赢。我教子,唯一经。

勤有功,戏无益。戒之哉,宜勉力。